

四庫全書

史部

欽定四庫全書

史部

皇朝通典卷四十一

編修臣李傳熊覆勘

總校官編修臣程嘉謨

欽定四庫全書

皇朝通典卷四十一

禮

吉一

臣等謹按杜佑通典首載歷代沿革禮於前次為
開元禮纂於後誠以經制文章與儀節度數並相
輔以行也欽惟我

朝

列聖相承重熙累洽規模隆盛載在冊府垂法萬世有

大清會典則例以詳其制度有

皇朝禮器圖式以著其形模悉經

睿裁訂定損益折衷至為賅備至於儀文秩序條理燦

然則

大清通禮一書準彛章而垂定式並非前代禮書所能

及其萬一焉謹考

典文次第纂紀為

皇朝禮典二十二卷凡五禮序次條目於杜典並有更

天

定增刪各於本門加案聲明其儀注悉以通禮為準云

郊

臣等謹按杜典郊天一門凡冬至大祀孟春祈穀並入焉今考漢代以後祈穀禮多不行而正月之祀且與冬至相混二祭不分相沿已久

本朝郊

天之禮冬至

圜丘孟春

祈穀鉅典並修敬勤之義斯為至矣伏惟

列聖事

天之誠迴超前代凡

郊壇大禮歲皆

親詣具著典策我

皇上精虔昭格膺

鴻眷而集

繁釐自

臨御以來無歲不

躬親祀事珥筆之臣有紀纂所不能盡者茲篇於冬至

南郊孟春

祈穀敬詳

肇舉之隆儀以及增修之懋制兼稽

列聖升配舊典悉為恭載如左

天命元年貝勒以下諸臣奉上

太祖高皇帝尊號立國建元行焚香告

天禮

天聰十年王貝勒以下諸臣奉上

太宗文皇帝尊號是年始建

園丘于

盛京德盛門外制九成周圍一百十丈南門三東西

北門各一

太宗率王貝勒以下文武羣臣齋戒三日於四月乙酉以

太牢

親祀

南郊建國號曰大清改元崇德是為

本朝祀

天於郊之始舊例以生太牢祭告即以祭肉分給衆官

太宗諭曰古帝王當未知火食之前即行祭天之禮是以
用生牢致享後世特踵而行之未之有易耳況以恭祀

上天之胙分給衆官令各於其家享之是反污褻也可熟而薦之祭畢即於

上帝神位前分享乃為潔誠於是定制祭

天用太牢熟薦十一月乙丑冬至大祀

天於

圜丘時將征朝鮮並告出征是為冬至大祀

圜丘之始七年冬至以

駐蹕納蘭遣官恭代齋戒如禮停止行獵

順治元年十月乙卯朔

世祖章皇帝定鼎燕京

親祀

南郊告祭

天

地即皇帝位是年定制每歲冬至大祀

天於

圜丘以

大明

夜明

星辰

雲雨風雷為四從壇配享又定制每年正月上辛日祭

上帝於

大享殿祈穀禮儀與冬至大祀同惟不設

從壇神位不燔柴

圜丘在正陽門外南郊形圓象天南向三成內壇形圓周

百有六丈四尺門四外墻形方周二百十丈一尺
門四墻北門後為

皇穹宇南向形圓左右廡各五間圍垣形圓周五十六丈
六尺八寸南向門三墻外圍垣門四東曰泰元南
曰昭亨西曰廣利北曰成貞門北為

祈穀壇形圓南向三成上建

大享殿

今改為
祈年殿

制圓左右廡各九間內墻周百九十

丈七尺二寸門四北門後為

皇乾殿殿五間墻外圍垣門四南接成貞門內外圍垣二
重內垣周千二百八十六丈一尺五寸外垣周千
九百八十七丈五尺西向門二南北並列南入

圜丘北入

祈穀壇十一月丁未冬至大祀

天於

圜丘

親詣行禮二年十月定

郊祀齋戒及設玉帛祝文香亭儀注三年四月設守視

天壇

地壇

社稷壇官員四年三月禮部奏言

國初定制祀

南北郊及

社稷壇向例俱用生牢今應如舊惟

南郊以胙牛一進

上得

旨照舊例如朕親祀則照例進胙牛遣官則止五年十一

月戊辰冬至大祀

天於

圜丘奉

太祖高皇帝配享八年三月定祭祀齋戒例四月定諸王

羣臣陪祭扈從及送

駕接

駕儀注六月定制凡祀

圜丘

方澤先期三日遣公侯伯一人祗牲前二日遣禮部堂官

省牲十三年七月禮部奉

諭旨致祭

天

地不可不虔嗣後凡祭

圜丘

方澤朕於五鼓出宮爾部先期一日奏聞十四年正月辛亥祈穀於

上帝奉

太祖高皇帝配享二月

諭禮部

南郊祀

天理宜嚴重祀前一日朕親宿齋宮祀前五日朕親詣祇牲如遣官恭代亦著詣壇齋宿祇牲是年以後祇牲之

禮前期五日遣官恭代為常三月禮部奉

諭旨禮莫重於祀

天孝莫大於尊

親朕纘承鴻緒恪修典禮每歲

郊祀皆奉

太祖高皇帝配享今思

太祖受命

上天肇興帝業

太宗繼志述事丕振皇猷功德並隆咸宜崇祀以後冬至
祈穀祭

天俱奉

太宗同

太祖配享夏至祭

地亦奉

太祖

太宗配享著為定制部臣議奏肇行配享大典攸闕現今

夏至在通冬至尚遙若先

方澤而後

圜丘於序少黍若俟冬至

太宗配

天之後明歲舉行

方澤配享禮為期太遠應不俟冬至夏至即恭製

太祖

太宗神牌擇吉先行

太宗配享

園丘

祈穀壇之禮隨行

太祖

太宗配享

方澤之禮奏上悉如所議至日

親詣行禮恭奉

太宗文皇帝神位配享十七年二月

諭禮部帝王奉

天子民禮隆禋祀享

帝大典所關尤重必儀物克備乃足昭對越之誠向來郊祀惟冬至用燔柴禮

祈穀壇未經舉行雖祀典原有等差而同為祀

上帝典禮不宜有異嗣後

祈穀亦行燔柴禮四月巳酉合祀

天

地

百神於

大享殿先是二月

諭禮部帝王父

天母

地裡祀大典務求至當朕稽考舊章洪武初原係孟春合

祭南郊至嘉靖年間始定分祭冬至祀

園丘夏至祭

方澤春分朝

日秋分夕

月而合祭之禮遂止朕思合祭之禮原以畢萃神祇普薦馨香不宜竟廢今欲祇申昭事之誠每年孟春合祭

天

地

日

月及諸神於

大享殿但禮關重大爾部詳議以聞部臣議合祀事宜奏

上奉

諭旨合祭典禮已定於孟春舉行今雖時序已過大典肇
修理應本年即舉爾部擇期速議又

諭孟春祈穀向例於

大享殿今

大享殿合祭以後祈穀禮於

圜丘舉行

謹按是年之後合祀旋罷
祈穀禮仍於

大享殿舉行十八年正月

已未

聖祖仁皇帝登極遣官告祭

昊天上帝尋以諸臣詳議祀典請罷禁中

上帝壇及

大享殿合祀從之十一月丙子冬至

聖祖仁皇帝大祀

天於

圜丘

親詣行禮

康熙六年十一月

諭朕惟自古帝王建極綏猷保民圖治莫不以懋昭先德
祇盡孝誠為務朕纘承丕基躬親庶政恭惟

世祖章皇帝功德兼隆當崇配享是用上稽前典下協輿
情謹告

天

地

宗

社率諸王貝勒文武羣臣於康熙六年十一月七日丁

未冬至大祀

天於

圜丘恭奉

世祖章皇帝配享祀日

聖祖仁皇帝親詣行禮是月丙辰即舉行配享

方澤禮九年正月辛丑祈穀於

上帝奉

世祖章皇帝配享十二年八月禮部奉

諭旨議奏歷代致祭時辰俱未畫一詳定請照

太宗文皇帝時

壇

廟用黎明

夕月壇用酉時又言歷代致齋俱於別殿今凡遇祭祀
皇上應於別殿齋戒從之二十五年十二月禮臣議請大

祀陪祀官員不照加級止論職掌有失儀者監察
御史及禮部指名題叅其他中祀亦如此例行疏
上從之二十八年十二月

諭祈穀祝文每年皆用定式既為民祈求宜直抒情事去
歲直隸亢旱已經蠲免賑濟但三冬雨雪甚少朕心仍
切焦勞此祝文該衙門將朕肫懇卹民之意切實撰擬
進覽二十九年正月辛丑祈穀於

上帝

卷四十一
親詣行禮

御製祝文曰臣繼承鴻業撫育蒸黎惟貴粟重農先務是
亟荷

天之眷歷紀順成率土元元久沾樂利頃者歲行在己旱
暵為憂畿甸之間阻饑尤甚臣覩災饑閔此窮簷宵旰
省惟中情惶惕殫心賑救罔敢暇寧顧時閱三冬同雲
鮮應側席減膳倍篤焦勞茲者候屆上辛田功肇始伏
念

天心仁愛必軫民力艱難苟非

錫以豐穰何由共登康乂敢因祈歲展竭悃誠冀昭事之
精虔荷

穹蒼之鑒格謹率臣僚以玉帛牲醴粢盛庶品恭祀

上帝仰祈

右茲將享時若雨暘用觀百穀之登溥洽三農之慶尚饗

四十六年十一月丁丑冬至大祀羣臣請遣官恭

代弗許

諭內大臣大學士九卿等

郊祀大典諸臣以天時嚴寒請朕勿親詣行禮朕身體強健步履安和毫不知倦若果稍有患苦即遣皇太子或大臣代行典禮何不可之有今身既無恙可欺妄乎況年齒漸增正欲乘未老之時躬親行禮耳四十八年正月辛巳祈穀於

上帝

御製祝文曰臣仰承

眷命撫育萬方念切民生亟圖康乂兩年以來江浙地方
遭罹水旱民失生業去歲山東河南亦因被旱田禾歉
收又去冬至今乾暵無雪臣雖抱病心切靡寧邈自順
治二年以迄今日垂七十載承平日久生齒既繁野無
曠土縱當大獲之歲猶慮民食不充倘或偶遇旱潦則
臣雖竭力殫思蠲租散賑而窮鄉僻壤豈能保無轉於
溝壑之人在臣憂國憂民之念即始終不渝而雨澤應
期實惟

上天仁愛愚民是賴茲者時屆上辛春耕將舉臣理應躬詣齋次祇修祀事但今辛荷

天佑疾漸痊愈而肅將大禮尚未克勝身雖不能致齋而為萬民懇切禱祈之誠敢用攄布仰籲

洪庥特命臣僚潔蠲敬戒虔備玉帛牲醴粢盛庶品恭祀上帝伏冀

昭鑒俾雨暘時若百穀用成三農宏濟尚饗五十年十一月戊戌冬至天祀羣臣以

聖躬違和請遣官恭代報可尋奉

諭旨朕躬安好如常必親祭方展誠心朕今年已六十行禮時兩旁人少為扶掖可也至日遂

親詣行禮五十四年正月辛酉祈穀於

上帝是年正月十日上辛尚未立春

諭旨以從前亦有用次辛下辛致祭者令諸臣議之乃以

正月三十日下辛行禮十一月己未冬至大祀

天於

園立用

御定雅樂

詳見樂典

五十七年十一月乙亥朔冬至大祀遣官

恭代先是

諭大學士等十一月冬至祀

天明日即應齋戒朕因足乏力來至湯泉身雖在此瞻望郊壇不能釋懷爾等傳諭太常寺令將齋戒銅人照常送至乾清門朕在此照常齋戒其祭祀人員齋戒務令恭敬五十八年十一月庚辰冬至大祀

天於

園立命親王恭代仍

親往瞻拜行禮先是

諭大學士等敬

天尊

祖所關重大年來因多病足痛不能親往遣大臣恭代今
冬至齋戒之時朕足雖不得力潔誠之念有餘擬於祭
祀之前升

壇瞻仰省視俎豆量力跪拜退處幄次俟恭代親王行禮畢然後回宮此係創行之禮如漢大臣以從無此典引據書史為言朕年已老在位六十年矣豈易得此例乎

諸臣覆奏

聖體初愈天氣嚴寒請停

親祭又奉

諭旨朕必親往前者偶未親祭王以下公以上俱不齋戒此次著照常齋戒隨朕前往不必隨朕行禮朕行禮時

不必贊禮作樂俟拜畢至更衣幄次派出親王偕衆行禮禮畢朕乃回宮將朕親詣之處著書於祝文內六十

一年十一月

世宗憲皇帝登極冬至大祀遣大臣恭代行禮

雍正元年正月辛卯祈穀於

上帝

世宗憲皇帝親詣行禮九月

諭禮部自古祖功宗德制在不祧饗帝饗親理應並舉報

本之情罔極配

天之典宜隆我

皇考聖祖仁皇帝允宜崇祀

郊壇克配

上帝以後冬至祈穀祭

天祇奉

聖祖仁皇帝同

太祖高皇帝

太宗文皇帝

世祖章皇帝配享夏至祭

地亦如

南郊祈穀禮祇奉配享其詳議以開十一月辛丑冬至大

祀

世宗憲皇帝親詣行禮恭奉

聖祖仁皇帝配享二年正月辛巳祈穀於

上帝奉

聖祖仁皇帝配享七年正月

詔嚴

壇

廟演禮之禁部臣議奏凡祭祀執事等官當在凝禧殿演
禮如有特加祭典先期於神樂觀演習從之十二
月奉

諭旨定例正月上辛日祈穀於

上帝若上辛在初五日以前則於次辛行禮雍正三年五

年俱以次辛祈穀仍舊章也但思元旦朝賀者朕躬之
禮儀上辛祈穀者祀

天之大典明年正月初二日上辛禮部請於十二日中辛
行祈穀禮朕思以正月而論則十二日為中辛若以立
春後而論則為下辛矣因朝賀筵燕而展祈穀之期朕
心深有未安著於初二日上辛行禮先期照例敬謹齋
戒停止朝賀筵燕嗣後若逢元旦上辛則於次辛祈穀
如在初五日以前或值初七日

世祖章皇帝忌辰著兩奏請旨八年十一月冬至大祀前

期奉

諭朕自臨御以來每值

圜丘大祀必親詣行禮至誠至敬以展對越

上帝之悃忱今年冬至之日恭遇

皇考聖祖仁皇帝忌辰禮部太常寺引康熙三十九年及

四十五年正月初七日祭

祈穀壇恭遇

世祖章皇帝忌辰遣官恭代之例奏稱今年

郊祀之期應照此例遣官恭代朕為此五中輾轉今年不

親行

郊祀之禮於心甚為不安其如何得展朕心而又符合典

則著大學士九卿敬謹妥議具奏大學士等奏言記稱

君子之祭必身親蒞之有不能親則使人攝可也

周禮春官亦稱大祭祀若王不親則攝祀唐宋之

制大祀與國忌同日者樂備而不作然議者謂饗

神不可無樂未若攝祀之當乎禮也應仍遣官恭
代以展明禋奏上從之十二年十二月奉

諭旨前太常寺奏請於雍正十三年正月初十日恭祭

祈穀壇今順天府尹奏於雍正十三年正月十二日進春

朕思祈穀乃新春典禮似不應在立春以前其定議以
聞部臣請以次辛二十日行禮從之十三年九月

皇上紹登大寶逾三月後羣臣以祀典上請奉

諭旨

郊

廟大祀朕不敢因一己孺慕之私情有缺

天

祖禘嘗之鉅典所議朕詣行禮甚是但先期齋戒所以潔
齊心志對越

神明朕意齋戒之日即當素服冠綴纓緯其視祝版亦當
照例用禮服以昭敬謹

乾隆元年正月辛丑祈穀於

金史卷之四十一
卷四十一
上帝

皇上親詣行禮十二月

諭禮部仰惟

皇考世宗憲皇帝德並高深恩覃海宇駿烈鴻功垂裕萬

世允宜配享

郊壇永崇禋祀朕思來年三月升祔

太廟之後配享之禮理宜敬謹舉行第其時夏至伊邇冬

至尚遙敬稽我朝舊制順治十四年三月

世祖章皇帝恭奉

太宗配享

園丘翌日配享

方澤康熙六年十一月丁未時屆

南郊

聖祖仁皇帝恭奉

世祖配享越十日配享

方澤兩朝典制均係特行禮隆儀備燦垂史冊且稽之經

傳成周郊祀后稷以配天宗祀文王於明堂以配上
帝卽月令所謂季秋大享帝也召誥三月丁巳用牲
于郊釋者謂非常祀而祭天以告卽位也又宋仁宗
皇祐二年以大慶殿為明堂合祭天地三聖並備一
如南郊圜丘之儀則是古來因事郊祀之禮不必定
在二至之時明矣我朝舊制盡孝盡誠與古符合來
年

世宗憲皇帝配

天大禮宜遵照奉行於是禮部議奏上奉

諭旨爾部具奏

皇考配享

天壇儀注朕敬謹詳閱內稱配享時朕恭奉

神牌陞壇奉安於東三青幄次並未議及祇見

上帝之儀朕思升祔

太廟時先行祇見

列祖

列后禮畢然後陞座今配享

園丘亦應先行祇見

上帝禮然後陞座於理方協議政王大臣等遵

旨議奏增入祇見

上帝儀夏至配享

方澤祇見

皇地祇俱遵此儀至上辛配享

祈穀壇不必再行祇見禮疏入從之二年四月甲戌大祀

天於

圜丘奉

世宗憲皇帝配享三年正月辛酉祈穀於

上帝奉

世宗憲皇帝配享四年正月初四日上辛

祈穀之期以前三日齋戒時值元旦改用次辛於十四日

行

祈穀禮七年十一月辛巳冬至大祀

皇上親詣行禮前期奉

諭朕惟

郊壇祭祀必致誠敬以薦明禋歷來前期齋戒悉遵舊制
住宿別殿今

郊壇建有齋宮若於致祭之期親詣齋宮更為祇肅該部
詳酌妥議具奏自是定制

大祀前一日

皇上親詣齋宿又是年始定乘輦之制舊例皆

御禮興至是禮臣議奏

郊祀典禮最鉅是以歷代制度車輦儀仗備列尊崇所以
肅明禋而重禮制也周禮祀天用玉輅晉宋以後
並皆遵循無異唐宋參用大輦或乘輦自齋宮赴
壇或祀畢御輦還宮雖儀節間有不同皆乘輦輅
今

親祀

南郊前期詣

齋宮請

御王輦為宜從之十一年正月以上辛在初四日照四年之例改用次辛日行

祈穀禮十二年十一月丁未冬至大祀後六日奉

諭旨古天地大祀前期有百官受誓戒之禮周官冢宰祀五帝則掌百官之誓戒唐宋則掌以太尉或於尚書省或於朝堂明初誓於中書省後於闕門宣制嘉靖中則親御奉天殿百官朝服聽誓戒所以聳衆聽

而致肅共儆怠玩典至重也國朝祀典太常寺先期
行文出示蓋本古人誓戒遺意而集衆宣示儀章未
舉朕思八政祀居其首而大祀莫重於郊嗣後有事
於

圜丘

方澤

祈穀

雩祭應於午門前宣誓戒陪祀之王公文武大臣官員朝

服齊集跪聽行禮以明齊明嚴敬之義大學士會同該部稽古具儀以聞尋具儀奏上行如儀十二月奉旨議定

郊壇大祀省視

神位上香及省視牲器之禮尋大學士等遵

旨議奏

皇帝詣

齋宮日詣

皇穹宇

皇乾殿

皇祇室內上香次詣

壇視

壇位又次

閱籩豆畢詣

齋宮從之十三年正月奉

諭旨國家敬

天尊

祖禮備樂和品物具陳告豐告潔所以將誠敬昭典則也
考之前古籩豆簠簋諸祭器或用金玉以示貴重或用
陶匏以崇質素各有精義存乎其間歷代相承去
古寔遠至明洪武時更定舊章祭品祭器悉遵古而
祭器以薳代之惟存其名我朝

壇

廟陳設祭品亦用薳蓋沿前明之舊

皇考世宗憲皇帝時考按經典範銅為器頒之

闕里仰為世守曾宣示羣臣穆然見古先遺則朕思

壇

廟祭品既遵用古名則祭器自應悉用古制一體更正以

備隆儀著大學士會同該部稽核經圖審其名物度
數制作款式拆衷至當詳議繪圖以聞朕將親為審
定敕所司敬謹製造用光禋祀稱朕意焉十月奉

諭朕敬

天尊

祖寅承祫祀

壇

廟祭器聿既稽考古典親為釐定命所司準式敬造質文

有章精潔告備自今歲

圜丘大祀為始灌獻陳列悉用新成祭器展虔敬焉古者

崇郊享則備法駕乘玉輅以稱鉅典國朝定制有大
駕鹵簿行駕儀仗行幸儀仗其名參用宋明以來之

舊而旗章麾蓋視前倍簡今稍為增益更定大駕鹵簿為法駕鹵簿行駕儀仗為鑾駕鹵簿行幸儀仗為騎駕鹵簿合三者則為大駕鹵簿

南郊用之

方澤以下皆用法駕鹵簿五輅酌仿周官及唐宋遺制金玉象革各如其儀乘用亦自今歲

南郊始光昭羽衛用肅明禋諭所司知之十四年五月內閣奉

諭旨朕於

兩郊大祀先御齋宮以齊一思慮聞之記曰齋者耳不聽
樂孔子曰三日齋一日用之猶恐不敬二日伐鼓何
居言不敢散其志也今齋宮宵漏下鳴畫角嚴鼓以
為節雖異於宮懸合奏而吹角鼓鑾軍中之容豈所
謂專致其精明者歟此蓋相沿前明弊典未更後此
嚴更鼓角不當用之齋次大學士其會同禮部定議
以聞大學士等遵

旨議定嗣後

齋宮吹角嚴鼓悉行停止以昭肅穆是月

皇上以夏至大祀

方澤詣

齋宮齋宿

命大學士等議修

兩郊壇宇尋遵

旨議奏及時興修疏上

上命和親王海望王安國三和總理其事十五年正月
諭和親王等

園丘壇上張幄次及陳祭品處過窄既議鼎新可將

園丘三層臺面仍九五之數量加展寬則執事者得以從
容進退益昭誠敬至稷薦向係滿鋪則臺面可以不
用琉璃著改用金甌益經久矣王等奏上

特命大學士等議奏大學士等奏言

郊壇規制其意貴乎法古而數貴乎合宜謹案易大傳曰

天數二十有五蓋一三五七九皆奇屬陽而五為
中數九為老陽是故洛書用五統奇大易用九策

筮煌煌

聖諭仍九五之數量加展寬至為精當查明時上成用
五丈九寸當九五之數稍涉牽合而三成用十二
丈則於奇義無取今據奏以古尺計度臺面上成
徑九丈為取九數二成徑十五丈為取五數極為
妥協惟三成徑十九丈雖亦為奇數然非由九而

生謂為仍取九數未盡脗合擬請三成而徑用古尺二十一丈取三七之數上成為一九二成為三五三成為三七則天數一三五七九于此而全且合三成徑數共四十五丈於九五之數尤為脗合再考古尺制起黃鍾數協九九我

聖祖仁皇帝審元音而定以作樂我

皇上重

郊壇而推以制禮義既法古而數更合宜應如所奏照依

律呂正義所載古尺制度上成面徑九丈二成面
徑十五丈惟三成面徑二十一丈確核今尺按數
興修又查壇面輒塊原制上成圓面九重自一九
遞加環砌以至九九其義甚精允宜仍舊至二成
七重三成五重圓輒不拘未免參差臣等酌議壇
面既加展寬二成三成擬合亦用九重遞加環砌
二成自九十至一百六十二三成自一百七十一
至二百四十三體制方為整齊再查金輒向例不

過見方二尺餘今上成鋪面每塊長濶至三尺五
六寸誠難燒造應如所奏用艾葉青石敬謹成造
俾保永遠堅固又前奉

聖諭臺面梭薦滿鋪是以改用金甌若欄板則係露明
不便利用青石應請仍用琉璃成造至原奏稱瑠
璃欄板每塊長四尺五寸有餘難以燒造臣等伏
思欄板扇數加多則尺寸自然減少擬請三成欄
板共用三百六十扇應周天度數上成每面十八

扇四面計七十二扇每扇之長得今尺二尺三寸
餘二成每面二十七扇四面計一百八扇每扇之
長得今尺二尺六寸餘三成每面四十五扇四面
計一百八十扇每扇之長得今尺二尺二寸餘則
扇數加多尺寸減少自然易於成造而每成每面
亦皆與九數相合總計三百六十較之二百一十
有六取義尤為明顯再查原奏三成徑數俱係古
尺而所定中心圓面週圍壓面及九重之長則皆

條今尺至三成臺高現今上成高五尺七寸二成
高五尺二寸三成高五尺並欄柱長濶高厚踏埽
寬深亦係今尺臣等逐項悉按古尺核算略為增
減皆與九數相合如此則

郊壇重典制崇法象數協乾元允足昭

盛代之宏規垂萬年之鞏固矣謹繪圖列數恭呈

御覽奏上允之嗣因琉璃欄板難以成造經總理工程

大臣奏明易用青白石須彌座用皐白玉石為欄

板柱子添安出水龍頭至十八年工竣十六年正月初三日上辛係在立春以前改用次辛日行

祈穀禮九月總理工程和親王等奏臣等奉修

兩郊壇宇伏見

祈穀壇匾額舊書天享二字殿與門相同竊疑名義未協詳考明史紀載緣前明初建大祀殿合祀天地至嘉靖中定南北郊二至分祀罷大祀殿不用其後致仕揚州同知豐坊疏請復古明堂大享之制蓋

傳會孝經嚴父配天語以迎合大禮之議時明世宗已尊生父興獻王為皇帝因並議稱宗以配上帝明堂秋享即於大祀殿行之改大祀為大享此殿與門得名所自始也

國朝既定

南北郊祀奉

祖宗升配爰舉祈穀之禮行禮之地即明之大享殿是以舊有題額襲用未改謹案大享之名見於禮記月

令篇蓋指季秋報祀而言與孟春祈穀異義仰惟
皇上釐定典禮式煥

郊壇理合仰請

聖訓別薦嘉名庶於祭義協應

上命大學士等議奏大學士等奏言

祈穀壇額實起前明嘉靖中原取季秋享帝之說以崇興
獻王已非成周明堂本制而殿宇告成以後每歲
大享咸在元極寶殿隆慶初並罷元極享禮是即

在前明時固已徒存虛名矣考祭法列叙禮神之
處於祭天曰泰壇於祭地曰泰折於祭日曰王宮
於祭月曰夜明雖郊壇不屋無事標題然循名足
以見義未有不相應者宋儒朱子有言為壇而祭
謂之天祭於屋下謂之帝天與帝其實一也隨地
而異其名耳

國朝孟春祈穀

上帝因殿行事準諸朱子所論屋下祭帝義例正自相通

天於

敬稽禮部每歲恭進祝冊於冬書某日冬至大祀
圜丘於春書某日祈穀典式備極昭著獨殿與門襲用大
享名號實覺未協仰請

皇上欽定嘉名俾昭

盛典尋奉

諭旨改曰祈年十九年三月大學士等奏午門外宣讀
誓戒之禮令各衙門恭錄

敕諭製牌收貯每遇

兩郊大祀太常寺豫奏通行令於致齋日恭設堂中隨時

仰瞻其宣讀之儀請停止從之二十三年正月以

上辛存初四日仍照四年十一年之例改用次辛

日行

祈穀禮二十四年十一月庚戌冬至大祀

天於

圜丘是歲西師告捷回部悉平時在冬至之前奉

諭旨殊勲克奏茂典應修

郊

廟告功宜申昭報時當長至朕方躬祀

園丘其敕所司敬舉受釐宣捷之忱載諸祝冊用申懇款

告祭

太廟朕親行展事

方澤

社稷照例遣親王恭代二十九年十二月

諭禮部前經該部請於正月初五日舉行祭辛典禮但
初五日在立春以前為時尚早應俟立春後初辛舉
行於義方協所有

祈穀壇典禮於十五日舉行三十五年三月奉

諭先期赴

壇時

神位前允宜躬親展謁其省視籩豆應按例專遣臣工蒞
視不必更行請旨至赴

壇所經道路向由

昭亨門外降輦步入第步履遙遠當質明行事轉恐失儀嗣後應改由

廣利門入於向時祭畢乘輦處降輦三十七年十一月丙寅冬至大祀詣

齋宮以石街積雪鑿儀衛奏請暫仍舊例乘用禮輦從之先是奉

諭朕御極以來夙夜孜孜惟以敬

天報本為念每屆

郊壇大祀必躬親昭事用展悃誠三十七年於茲未敢稍

懈向來詣

壇行禮日由降輦進至拜位以迄薦獻禮成中間履蹠升
降儀節最為繁重朕惟虔恪以臨無有愆忽今自念
春秋已逾六旬其於勤容周旋差不能及前此之從
容中節幸朕躬康彊如昔仍得祇循儀度經久不渝
第思敬意所持貴乎內外交養若精力過勞恐心志

轉未能統一與其拘于行走末節弗克致其寅恭且
或因此而憚於親詣何如酌損步陟繁文得專於升
馨告備時肅將劼愆更足以嚴對越而抒誠悃乎自
古帝王履帝位而臻壽考者載籍曾不多覩我朝景
運遐昌化成熙洽上荷

吳蒼鴻眷

列祖貽庥朕周甲已逾勵勤未怠真可謂國家祥瑞之大
者茲特降此旨非敢自惜其勞惟期要之於久從此

更增年歲當永矢此昭格之誠我世世子孫承庥衍
慶即可奉此為法守且知朕六十歲以前不憚經曲
之繁六十歲以後冀申專壹之敬初無二致也所有
升降次數及降輦步行之遠近無關大體諸儀節應
如何酌定合宜之處著大學士會同各該衙門敬謹
詳悉妥議具奏大學士等奏言

郊祀前一日

皇上先期蒞

齋宮乘步輦入自西天門由

齋宮南

御禮轎至神道西降輿步入琉璃左門詣

皇穹宇上香禮成仍於降輿處

御禮轎還

齋宮其視

壇位即令原遣視牲之親王恭代行禮祀日

皇上自

齋宮乘步輦行至神道西階下幄次相對處降輦升

階由

櫺星左門步入禮成仍於降輦處

御禮轎還宮其行禮時

皇上初升至二成拜位立贊引官奏陞

壇

皇上升階上香畢還至二成拜位行迎

神禮典儀官唱奠玉帛

皇上升階行奠玉帛禮還就讀祝位立以次進俎三獻
及飲福受胙禮成仍還至二成拜位行謝

福胙及送

神禮並酌議

祈穀前一日

皇上乘輦入西天門於

齋宮東

御禮轎至西磚城左門間降輿步入琉璃左門詣

皇乾殿上香具視

壇位即令視牲之親王恭代祀日

皇上自

齋宮乘輦至東北甬道適中處

御禮轎至南磚城門外神道西降輿由左門步入就幄

次自

祈年左門入行禮禮成仍於降輿處

御禮轎還

齋宮至酌減行禮升降儀節與

圜丘儀同從之三十八年正月以上辛值元旦改用次辛

於十一日行

祈穀禮三十九年正月

諭朕臨御以來恒以敬

天報本為要不敢稍有怠惰凡

壇廟大祀必親詣行禮自降輦以至禮成一切典禮必敬
必誠四十年來未敢少有怠忽而一切禮儀宜盡之

處靡不加增至三十七年朕年逾六旬始敕大學士
及該部將降輦步行之遠近及升降之無關鉅典者
酌減一二蓋欲稍減步履之小節蓄養精力期於大
典益致恪恭亦因朕年逾六旬始如此酌量節減所
以益矢誠敬也萬世子孫具敬識朕意於諸大祀設
非年至六旬一切典章斷不可稍減倘蒙

上天眷佑年逾六旬方可遵朕現在所行舉行將此永著
為例四十年四月

諭朕每遇

郊壇大祀必親詣行禮歷四十年如一日弗敢稍有懈弛
一切儀文典禮悉本誠敬之心仰期

昭格凡諸升降拜獻弗愆於儀實有可以自信者惟是行
禮時諸皇子向不在陪祀之列無由知朕恪恭將事
之忱著於本年冬至

南郊令諸皇子在旁侍立敬謹觀瞻祀事既歲並令就
壇位前恭閱朕所進之爵皆安奉端正無稍偏欹俾共體

朕所以展

精禋而答

鴻眈者實在乎是其敬承毋忽四十二年正月以上辛在

初四日仍照四年十一年二十三年之例改用次

辛日行

祈穀禮四十三年八月

皇上恭謁

祖陵至

盛京

命修葺

盛京

天壇四十四年十一月

諭

南郊典禮最為繁重恐過勞生憊轉非所以將誠意因思
正位晉獻香帛爵自當躬致申虔至

配位

列祖

列宗惟上香仍前親奉其獻爵進俎諸禮則命諸皇子恭
代庶得少節煩勞以專心禱薦即自今歲冬至為始
四十五年正月以上辛在初二日應於隔年齋戒
時值禘祭

太廟改用次辛日行

祈穀禮四十六年十二月

諭本月二十三日内閣進呈禮部具題壬寅各

壇

廟祭祀齋戒日期一本冊開正月十四日次辛祀

祈穀壇所擬甚屬不當天子父

天母

地祇承之義不可稍弛從前雍正七年恭奉

皇考世宗憲皇帝諭旨以定例正月上辛若在初五日以前則改於次辛但元旦朝賀乃朕躬之禮儀若因此而展祈穀之期於心實有未安著於上辛行禮煌煌

聖訓實屬萬世不刊之論朕御極以來遇正月初三日以前上辛因必須隔年齋戒是以改用次辛其有初四日上辛亦改用次辛行禮者則因

聖母皇太后祝釐初祉朕於元辰躬率王公大臣拜賀東朝儀節不容稍缺至明歲正月初四日上辛並非向年可比矣該部何得亦改次辛況冬至南郊禮成有於次日受賀者所謂禮緣義起而義以方外尤必敬以直內如謂臣下意在尊君不敢輕易朝正令典亦當

備查往例具奏請旨乃禮部遽行題達何昧昧一至
於此至閣臣職司票擬於此等典禮攸關之章疏何
以並不細心請旨擬簽必待朕自行看出耶所有禮
部堂官著交部嚴加議處大學士著交部察議至祀
典本屬吉禮而上辛

祈穀尤歲首鉅儀乃該部必於二十三日具題閣臣亦即
於是日呈進朕雖不以責備而諸臣疎忽若是可為
不知仰體朕懷矣所有明歲

祈穀行禮仍用上辛並著為令將此通諭中外知之又奉
諭旨禮莫大乎敬

天義莫隆於

郊祀前以禮部具題壬寅年祭祀

壇

廟各日期將

祈穀行禮改用次辛所擬不當已明降諭旨仍用上辛矣

孟春

祈穀所以迓陽氣而兆農祥考諸經傳蓋指孟春以後之
上辛雍正年間恭奉

皇考聖諭飭禮臣定議允宜永遠遵守敬思其義若上辛
在立春前舉行與來陽之義未為精當又上辛設在
正月初三日以前則當於舊臘隔年齋戒而

太廟祫祭實為合饗大禮即宮中拜

神亦屬國朝定例若於齋戒期內照舊舉行於專一致敬
之道似猶未協其應如何斟酌古今益臻明備並百

世遵守可行之處著大學士九卿詳晰妥議具奏尋
大學士等奏言上辛

祈穀以立春後所得之辛始為上辛若立春後之辛尚在
上年十二月內則仍用正月之上辛以符歲首之
義至正月初四日上辛應於初一日齋戒起是日
皇上未入齋宮之前

宮中拜

神

奉先殿行禮均可各昭誠敬即毋庸改期從之又奉

諭旨朕自臨御以來每遇

郊祀大典無不蠲潔躬承四十六年如一日仰荷

昊蒼眷佑壽域古稀仍當躬親行禮而一切登降禮儀步

履究覺稍遜於前若遣官恭代非朕勤於躬親昭事

之初心而勉強將事復於精一凝承之意轉有未盡

因諭該部前往敬視

祈穀壇宿齋宮詣

壇瞻拜日降輦處茲據福隆安等奏請擬由

皇乾殿西牆門外降輿較為近便等語應如所奏交各該衙門遵照辦理此朕仰體

上天眷愛朕躬長申寅恪之意將來朕子孫繼緒凝庥有壽登古稀者亦可欽承朕志於

郊壇大祀每歲躬行率由此典以上邊

皇天眷顧之隆庶幾無疆惟庥永膺

昊貺垂裕萬年將此通諭中外知之四十九年正月

諭朕臨御以來祇承寅畏於

郊

壇大典罔不恪恭將事親詣行禮本年正月初五日上辛
祈穀因去歲所患氣滯舊恙偶發誠恐登降儀節或愆轉
不足以昭誠敬此次著派皇六子永瑤恭代行禮朕
仍在齋宮敬謹齋宿屆期親詣

大高殿行禮凡

南郊

祈穀及

列聖升配儀節並具

大清通禮

皇朝通典卷四十一

欽定四庫全書

皇朝通典卷四十二

禮

吉二

雩祀

臣等謹按古者龍見而雩以為百穀祈膏雨是孟
夏之雩乃每歲常行之典至遇旱而禱則為大雩
我

朝

列聖相承旰食宵衣勤求民瘼凡遇水旱

躬詣

圜丘祈禱即古大雩之義乾隆七年

上命禮臣集議定制每歲孟夏行

常雩禮儀與冬至大祀同旱至季夏祈禱既遍乃奉

特旨敬舉

大雩所以為民請命者益致精虔敬稽典制詳載于篇又

凡祈雨之事義與雩同謹從類紀云

順治十四年四月

世祖章皇帝以旱禱於

圜丘先期率羣臣致齋三日官民衣淺淡色服禁屠宰不
理刑名至日

皇帝素服詣

圜丘不設鹵簿不除道不奏樂不設

配位不奠玉不飲福受胙餘行禮如常儀遣官致祭

方澤

社稷壇

神祇壇應時大雨越三日遣官行告謝禮十七年六月
諭禮部今夏亢暘日久農事堪憂朕念致災有由痛自刻
責穀為民天非雨不遂竭誠祈禱積有日時乃精誠未
達雨澤尚稽晝夜焦心不遑啟處茲卜於月之十三日
預行齋戒黎明步至

南郊於夜子刻祭告

圜丘懇祈甘霖速降以拯災黎若仍不雨則再行躬禱務

回

天意又

諭祭告為民請命應先詣

郊壇潔誠齋戒十三日步至

南郊即於彼處齋戒三日以十五日之夜祭告至日

皇帝率諸王文武羣臣素服步至

南郊齋宿是日早四際無雲頃之陰雲密布甘霖大沛越

三日行祭告禮於

圜丘祭畢雨復降越四日遣官行告謝禮

康熙十年四月旱

聖祖仁皇帝禱雨於

圜丘前期致齋三日素服詣

壇致祭旋以甘霖霑足遣官報謝如儀十七年六月

諭禮部朕惟天人感名理有固然人事失於下則天變應
於上捷如影響豈曰罔稽今天氣亢暘禾苗枯槁朕夙
夜靡寧力圖修省躬親齋戒虔禱甘霖爾部擇期具儀

來奏前期致齋至日

聖祖仁皇帝自西天門步行至

壇行禮時甘霖大沛仍步出西天門乘馬回宮自後十八

年四月十九年四月皆以祈雨

親詣

圜丘行禮得雨告謝並同二十六年五月

諭九卿等曰京師為天下根本之地乃幾月不雨朕甚憂
之欲躬行祈禱大小臣工宜盡誠齋戒毋循故事至期

素服乘馬自西天門步行至

壇行禮

御製祭文曰臣以眇躬仰承

天眷撫育羣黎兢兢業業惟恐隕越邇者自春徂夏雨澤
愆期京輔亢暘深懷疚懼良由眇躬不德政未咸宜大
小臣工罔盡厥心惟君臣之咎於億兆何辜前者循省
已過詔告四方而靈雨尚未霑足浹旬仰望彌切焦勞
茲特潔蠲吉日率勵羣工實圖洗心齋祓將事呼籲

上帝切望

慈庥伏冀

俯鑒誠懇大沛甘霖俾兆民之咸蘓惟邦家之有慶引領郊壇尚祈

昭格謹告祭畢

回鑒甘霖立降越日遣官告謝如儀五十五年五月
駐蹕熱河以天旱減膳齋戒

諭京師虔誠祈雨越七日雨始復常膳

臣等謹按

聖祖仁皇帝六十年中祈禱雨澤精誠感格史不勝書伏
考康熙五十六年冬

諭諸皇子及大臣等曰京師初夏每少雨澤朕臨御五十
六年約有五十年祈雨每至秋成悉皆豐稔昔年曾因
暵旱朕於宮中設壇祈禱長跪三晝夜日惟淡食不御
鹽醬至第四日步詣

天壇虔禱油然忽作大雨如注步行回宮水滿兩韉衣盡

霑濕後各省人至始知是日雨徧天下又

諭人言每月十八二十二二十四等日往往有雨宜
及此數日祈禱朕以為既知有雨而後禱此心便已不
誠矣恭誦

聖言仰見祈禱之誠有堯湯所弗逮者敬稽史冊所載謹
識於此

雍正元年五月旱

世宗憲皇帝減膳虔禱甘霖立沛二年二月

親詣

黑龍潭祈雨越數日

親祭

歷代帝王廟甘雨大霽羣臣衣盡霑濕各加

恩賜

御製喜雨詩羣臣恭和九年六月旱

命設壇祈禱即日大雨

臣等謹按

世宗憲皇帝十三年中偶值亢旱無不齋居虔禱立沛甘霖感格之誠昭垂史冊謹載數事以見

聖心之敬

天愛民始終如一日云

乾隆八年四月始行常雩禮於

圜丘先是御史徐以升奏言按春秋傳曰龍見而雩蓋古者有雩祭之典所以為百穀祈膏雨也祭法曰雩宗祭水旱也月令仲夏之月命有司祈祀山川百

源大雩帝用盛樂命百縣雩祭百辟卿士有益於民者以祈穀實是為常雩乃若偶逢亢旱則又有雩周禮稻人旱暵共其雩斂春秋書雩二十有一故有一月而再雩者旱甚也是又因旱而雩義雖不同要之雩祭之典自古有之考雩字為吁嗟求雨之義其制則為壇於南郊之旁故魯南門為雩門是雩壇實有其地矣自西漢之世雩禮始廢旱則禱祀天地宗廟晉永和時議制雩壇於國南郊

梁武帝始移於東郊又改燎柴而從坎瘞唐太宗
又雩祀於南郊宋制孟夏雩祀昊天上帝前明雩
壇在泰元門外是歷代皆雩也我

朝禮制具備會典載有

躬禱之儀獨於雩祭尚未設有壇壝似屬缺典雖

郊祀亦有

雲雨風雷之神與

嶽鎮海瀆之位而禮必有所專設乃於祈禱之典似更

覺誠敬周詳伏乞

敕下禮臣博求典故詳考制度於京城之內擇地建立
雩壇倣古龍見而雩之禮每年及期擇日致祭偶
遇亢旱愆陽雨澤稀少即於此望告

嶽鎮海瀆及諸山川能出雲雨者以祈求雨澤毋庸於
各宮觀處祈禱再者祈雨祈晴事同一體倘有雨
水過多祈求開霽之處請照祭法雩宗祭水旱之
例亦於雩壇致禱庶誠敬克伸於典禮似為允協

至於直省州縣亦應並設雩壇俾展祈求之典疏
上

詔禮臣詳議尋議奏孟夏龍見擇日行常雩禮祀

昊天上帝於

圜丘以

列聖配享

四從壇從祀於下前期禮部奏請

皇上親詣行禮或遣親王恭代孟夏後旱則祈

天神

地祇

太歲壇次祈於

社稷壇次祈於

太廟皆七日一祈不雨或小雨不足還從各壇祈禱如初

旱甚乃大雩祀

昊天上帝於

圜丘先經祈禱

太廟既已虔告

列祖此次不設

配位仍設

四從壇於下雨足則報祀或已齋未祈而雨及所曾經
祈禱者皆報祀如常儀其以前望祭四海之禮可
以停止再考古大雩用舞童二佾衣元衣各執羽
籥歌雲漢之詩今蒙

皇上倣雲漢詩體御製歌詩八章

聖念懇誠

宸章剴切從古未有應令舞童習歌交內務府製辦教
演若久雨祈晴之處歷考前代皆無崇祭雩壇之
禮請倣春秋左傳鼓用牲於社及文獻通考崇祭
國門之禮但伐鼓崇祭於京師國門視水來涌集
最多之門而祭仍雨不止則伐鼓用牲祭於社毋
庸於各壇祈禱至直省州縣所有耕藉田中皆設
有壇祀應令於孟夏擇日行常雩禮或有亢旱亦

每七日先祭界內山川次祭社稷致齋虔禱雨澤
但不得用大雩之禮其或淫潦為災則伐鼓用牲
崇祭城門以祈晴霽不必另設雩壇至京師雨暘
愆期

皇上於大內祈禱其專承祈禱之官

天神

地祇

社稷

太歲各壇遣王大臣一人

太廟

上帝遣親王一人應陪祀各官皆一體齋戒詣壇行禮如

遇

皇上親詣

圜丘王以下俱陪祀疏上皆從之是歲初舉雩祭

皇上已降旨親詣行禮太醫院臣奏

聖體微患初愈不宜勞動左右大臣言

皇上誠敬之心至轔至切足以昭格

穹蒼雩祭為常行之典不必今歲一定

親行乃遣恒親王弘晈恭代行禮九年四月

皇上親詣

園丘行常雩禮先五日奉

諭雩祭之典所以為百穀祈膏雨也從前定議禮儀悉

照恭祀

園丘之制行朕思目下畿輔雨澤愆期此次舉行雩祭正

望恩迫切之時非每夏常雩可比其先期前詣齋宮
及祭畢回鑾朕俱御常服不乘輦不設鹵簿不作樂
以示虔誠祈禱為民請命之意二十四年四月常雩
皇上親詣行禮以天時亢旱步行致禱先三日奉

諭旨日者恭逢雩祀農民望澤正殷朕宵旰靡寧仰祈
靈貺宜從抑損以懋寅承前期詣

壇齋宿所司應設法駕鹵簿一概停止視

壇位拈香時服常服至翼朝由齋宮步行恭詣幄次行禮

五月

皇上步禱

社稷壇

御製祝文薦玉行禮

詳見社稷

六月大雩於

圜丘前五日奉

諭旨朕躬祭

方澤值祈雨之時竭誠籲懇未獲甘霖夏至已踰迫不可待後日即進宮徹膳虔齋思過待

命十一日敬舉大雩之禮以祈

天佑

御製祝文曰臣奉

命嗣服今二十四年無歲不憂旱今歲甚焉曩雖失麥可
望大田茲尚未種赤地里千嗚呼其惠雨乎常雩步
禱未蒙

靈佑

方社

方澤均漢弗佑為期益迫嗟萬民誰救敢辭再瀆之罪用
舉大雩以申前奏嗚呼其惠雨乎

上天仁愛生物為心下民有罪定宥林林百辟卿士供職
惟欽此罪不在官不在民實臣罪日深然

上天豈以臣一身之故而令萬民受災害之侵嗚呼其惠
雨乎謹以臣身代民請

命昭昭在上言敢虛佞計窮力竭辭慙誠罄油雲沛雨
居歆賜應嗚呼其惠雨乎謹告先一日

皇上乘馬詣

齋宮齋宿正祭日戴雨纓冠素服步詣

園丘壇行禮越日大雨霑足乃令直隸總督飭所屬有司
勸種晚禾酌借牛具籽種以待秋成二十八年四
月微旱值常雩行禮

皇上躬致祈禱禮成得雨復以雨未霑足

親詣玉泉及

黑龍潭祈雨並遣官虔禱

天神

地祇各壇尋得渥雨報祀如禮三十二年四月常雩後

十日

親詣

黑龍潭祈雨並遣官虔禱

天神

地祇各壇尋得大雨報祀如禮三十五年四月微旱常

雩後旬日餘

親詣

黑龍潭祈雨並遣官致禱

天神

地祇各壇得雨報祀如禮四十三年四月常雩行禮

皇上以雨澤稀少

躬致祈禱越十日復

親詣

黑龍潭祈雨並遣官致祭

天神

地祇各壇請雨逾七日再禱如初又遣官往石匣龍潭
虔祈尋得渥雨均報謝如禮凡

雩祀儀節具

大清通禮

臣等謹按乾隆八年

皇上肇舉雩祀以來孟夏常雩歲皆

親詣惟

巡幸之年遣官恭代二十四年六月旱甚

特行大雩之禮並

御製禱雨告風文仁愛相通感孚即應至每歲常雩間

值望雨之時

詣齋宮日不乘輦不設鹵簿次日步行赴

壇

躬致誠祈甘膏即沛或以偶未優霑復

親禱龍潭以期渥霽並

敕禮臣按例虔申祈請精誠感格無不立應

記注所書有不能盡述者茲恭纂數次于篇以見
敬勤之至五十年來常如一日又自畿輔以至各省雨

澤或稍愆期即馳

詢地方大吏並再三

申諭毋許諱飾一經奏報優霑即

御製詩篇以誌喜慰恭誦之下仰見

聖心肫切所由感召

天和綏豐屢慶億萬斯年常膺

昊貺焉

臣等又按杜典有大享明堂一條考明堂之制始於成周歷代有之而制度迄莫能定漢儒所述如大戴禮白虎通蔡邕之說各不相符朱子謂郊者古禮明堂者周制蓋周公以義起之其不必強行於後代可知矣我

朝

南郊大祀

列聖配

天極尊崇之鉅典明堂之制不復建立洵為超軼前古此

條謹從刪去

朝日

夕月

順治八年六月定春分秋分朝

日夕

月之禮先是初定祀典以日月從祀

金匱要略卷之十二
天壇罷春秋二分祀事至是年禮臣請照舊典以春分秋
分日致祭於從祀

天壇外仍立

朝日壇於朝陽門外東郊立

夕月壇於阜城門外西郊從之又定

朝日壇以春分日卯時致祭值甲丙戌庚壬年

皇帝親詣行禮餘年遣官

夕月壇以

北斗七星

木火土金水五星

二十八宿

周天星辰共為從壇配享于秋分日酉時致祭值丑辰

未戌年

皇帝親詣行禮餘年遣官

雍正四年奏定

朝日壇向係露祭請照

社稷壇之例於

壇下別設神龕以備風雨並香鑪上增設鑪蓋

乾隆三年七月

諭今年

夕月壇舊例係遣官之年但朕即吉之後初次舉行朕親詣行禮以展誠敬四年禮部奏

夕月壇舊於酉時前六刻申時三刻請

駕至

壇尚隔酉時二刻此次

親詣

月壇行禮謹擬於酉時前四刻申時五刻請

駕至

壇適合致祭之時從之十一年二月春分

皇上親祭

朝日壇以次日日食不乘輦不設鹵簿不奏樂凡

朝日

夕月儀具

大清通禮

天神
地祇

臣等謹按杜典朝日夕月後別立禋六宗一條其禮迄於後魏而止自唐以後罕有述者伏考我

朝祀典有

神祇壇以禱水旱有

太歲壇以祭時並與六宗義合又雲雨風雷之祀

世宗憲皇帝聖諭取義六宗尤炳然不易者茲謹分為

天神

地祇等門詳載於後

順治元年立

天神壇於

先農壇之南以祀

雲師

雨師

風伯

雷師立

地祇壇於

天神壇之西以祀

五嶽

五鎮

啟運山

積慶山

天柱山

隆業山

四海

四瀆

京畿名山大川

天下名山大川歲遇水旱則遣官祇告祈禱有應則
報祀十四年以祈雨遣官致祭

天神

地祇得雨報謝如儀十六年停祭

積慶山

康熙二年封鳳臺山為

昌瑞山設位

地祇壇二十九年以祈雨遣官致祭

天神

地祇得雨報謝如儀

雍正十年以祈雨遣官致祭

天神

地祇得雨報謝如儀

乾隆元年封泰寧山為

永寧山設位

地祇壇二年六月

諭天時亢旱已逾兼旬見在虔誠祈禱尚未得霽甘霖

朕心深為憂惕

天神

地祇壇應竭誠致祭著禮部太常寺即察明典禮具奏
舉行禮部等遵

旨議上遣官致祭

天神

地祇得雨報謝如儀七年五月旱

命於

神祇壇祈雨增用樂章

詳見
樂典

十七年禮臣奏言

神祇壇本無專祀惟祈雨則祇告於壇而不奏樂自乾

隆七年始增設樂章揆之一應因事祇告之禮均
不作樂殊未畫一至甘雨霑足報祭之時僅用酒
果脯醢與祈告相同又與報祭之禮未稱請嗣後
各壇告祭停止作樂至報祭時均應加籩豆牲牢
即將

神祇壇樂章用於報祭

詔令更議之尋奏言凡祈雨之祭時當待澤孔殷蠲誠
致禱與因事祇告之禮原有不同儀文自宜周備

今奉

諭旨祭祀用樂以導和氣而格神祇乃事神之禮與齋戒徹懸其義各異且樂足以宣通陰陽之氣祈雨致祭仍當用樂為是應遵

旨仍用樂章奏上從之二十八年四月京師微旱遣官致祭

天神

地祇尋得雨報祭如禮三十二年四月三十五年五月

四十三年四月均以微旱遣官致祭得雨報祀如儀凡祈祀報祭儀節具

大清通禮

太歲

順治元年定每歲致祭

太歲壇之禮

太歲殿在

先農壇東北正殿祀

太歲之神兩廡祀

十二月將之神每年正月初旬諏吉及十二月歲除
前一日遣官致祭初春為迎歲暮為祖祖迎之禮
歲有常舉遇水旱則遣官祭告祈禱報祀如儀
康熙二十九年以旱祈雨遣官致祭

太歲之神尋得雨行報謝禮三十五年二月

聖祖仁皇帝親征噶爾丹遣官致祭

太歲之神

雍正十年以旱祈雨遣官致祭

太歲之神尋得雨報祭如儀

乾隆元年十二月祭

太歲壇遣親王行禮舊例遣太常寺堂官主祭是年

太常寺照例題請奉

旨遣親王行禮次年孟春亦如之二年六月以旱祈雨

遣官致祭

太歲之神尋得雨報祭如儀十六年禮部奏各壇祀

神均有上香之儀

太歲月將同屬天神則升馨求陽不應與他祭異況
偶逢祈雨致祭儀注見載上香其春冬二祭應行
上香禮兩廡分獻並同從之十八年禮部奏

太歲暨

十二月將神牌請於殿廡內供奉設神座於神龕前
祭時請神牌奉安神座祭畢復龕恭遇

皇上祀

先農禮成至

太歲殿上香時神牌安奉殿內不請出龕奉

旨太歲月將神牌照所奏安奉又是歲禮部奏

太歲殿現在樂章乃新正歲除通用與祈禱雨澤之

義全不相涉應交樂部別撰照

神祇壇皆用豐字以昭畫一從之

詳見樂典

二十年定

太歲壇改遣親王郡王行禮二十一年太常寺奏承

祭之官既改遣親王郡王而兩廡分獻仍如舊例

派廳員行禮於體制未協請嗣後用太常寺堂官
分獻臨時奏派從之二十八年四月三十二年四
月三十五年四月四十三年四月均以微旱遣官
致祭

太歲壇尋得雨報祀如禮儀具

大清通禮

風師 雨師等祠

臣等謹按杜典六宗之外又有風師雨師及諸星

等祠我

朝定禮以

雲雨風雷為

南郊從位又專立

天神壇以祀

雲雨風雷之神

北斗五星二十八宿周天星辰之神並從祀於

夕月壇已於各門詳載茲不重述惟

風神

雲神

雷神均特建廟宇於

京師又時應宮崇祀

龍神恭繹

世宗憲皇帝聖諭亦即以為

雨神謹彙著於篇並附直省特祀之典即以風師雨師

等祠一條移併於此

雍正元年奉

世宗憲皇帝諭旨以西苑紫光閣北前後殿改建為時應

宮前殿奉

四海

四瀆龍神後殿中奉

順天佑畿龍神兩旁左右奉十有七省

龍神每歲以六月十三日致祭遣內務府官行禮五

年遷直省

龍神位奉於各省增修後殿以奉

八方龍神六年二月奉

諭旨朕惟風雨時若百物繁昌皆由誠敬感格

天心用能福祐下民時和歲稔而司天號令長養阜成風神之貺厥功尤懋頻年以來朕虔祀龍神有祈必應歷有明驗因思風神巽順和煦茂時育物亦宜特隆祀典以答洪庥考之周禮大宗伯以禋燎祀風神虞書禋于六宗劉歆鄭康成之說咸謂六宗之內風神其一也歷

代各建壇兆至宋祥符間曾立風伯廟近代及本朝俱列

南郊四配之中典禮具備今欲於都城和會之地特建廟宇因時禱祀以展朕為民祈福之誠應如何攷據禮儀相度營建之處禮工二部會同內務府詳議具奏部臣等奏言伏查周禮以禋燎祀風師註鄭康成以風師為箕星即虞書六宗之一孔安國蔡沈洪範傳皆云箕星好風而馬端臨郊社考亦謂周制以立

春後丑日祭風師於國城東北蓋東北為箕星位
次丑亦應箕之位也漢劉歆等議立風伯廟於東
郊而東漢縣邑常以丙戌日祀風伯於戌地唐開
元禮則遵周制就箕星之位為壇祭之宋仍唐制
祥符間建風伯廟迨元及明亦各有祀典臣等會
同詳議於都城内東北擇得

景山東邊當東北箕星之位建廟甚宜其廟宇規制
倣時應宮酌量營建每年於立春後丑日致祭由

內務府敬謹備辦奏上允之乃封

風神為應時顯佑風伯之神廟曰宣仁廟前殿奉

風伯之神後殿奉

八風之神又河臣齊蘇勒疏言淮安府清河縣清口地方乃洪澤湖水出口敵黃之所從前建有

風神廟官民行旅皆致祭禱至於洪澤一湖諸水總匯全賴高堰大堤以為保障惟此堤工最忌西風鼓浪自昔傳有日費斗金之說比年每逢大汛從無

西風湖工平穩轉險為安皆由我

皇上念切民生懷柔百神感召

天和之所致也伏查水道河神凡有捍災禦患者俱蒙
敕賜爵號以彰神庥惟茲

風神福國佑民潛維默護

神功既懋褒錫宜隆伏乞一體

敕封以崇祀典禮部覆議從之乃封為清和宣惠風伯之

神七年二月奉

諭旨朕惟雲雨風雷之神代天司令俾百昌萬寶普含膏澤以錫福於烝民厥功並懋朕恭承

天眷恪修祀典為四海蒼黎仰祈嘉祐已經特建廟宇崇祀龍神風伯而雲師雷師尚闕專祀嘗攷虞書禋于六宗之文漢人以乾坤六子釋六宗震雷巽風均列禋祀而易曰雷以動之風以散之則風雷之發生萬物功實相等禮記曰天降時雨山川出雲周禮亦以五雲辨年歲是雲與雷皆運行造化同昭

天貺者也前代及本朝

南郊大祀雲雨風雷俱列從壇之次式隆配享典禮亦既
備矣邇年以來雲物兆祥雷行應候茂育庶彙宣暢陽
和庇國佑民之德靈應顯然今欲特建廟宇虔奉雲師
雷師之神因時禱祀敬迓洪庥以展朕為民祈福之意
禮工二部詳議具奏部臣奏言伏查尚書洪範五行傳
曰雷首長萬物為出入又論衡曰雷出地則長養
華實發揚隱伏宣盛陽之德易乾卦曰雲行雨施

品物流形左傳凡分至必書雲物以辨年歲是雲
師雷師錫福蒼生厥功甚著唐天寶五載增雷師
于雨師之次每歲於立夏後申日致祭宋元因之
明集禮增雲師於風師之次郡縣立雷雨壇於稷
壇西風雲壇於社壇東明會典載秋分後三日合
祭雲雨風雷壇今

雷師廟宇應建於西方立夏後申日致祭

雲師廟宇應建於東方秋分後三日致祭從之尋擇地

營建其規制祭儀俱倣宣仁廟乃封

雲師為順時普蔭雲師之神廟曰凝和廟

雷師為資生發育雷師之神廟曰昭顯廟十三年封廣

東遼海郡縣廟祀

風神為宣仁昭泰風伯之神封甘肅蘭州府廟祀

雷神為顯仁應瑞之神並春秋致祭從督撫諸臣請也

臣等謹按杜典有大禘一門禘古作蜡其典自元

明以來久已停止我

朝臣工有以蜡祭請者奉

皇上諭旨詳悉指示不必舉行今謹載

聖諭於篇中以見酌古準今折衷盡善之至意焉

乾隆十年十二月

諭大學士等國家崇報之文明禋禋薦薦考議周詳凡祀典所關羣神咸秩即如雩祭諸禮事繫農桑近復議行有舉無廢皆以為民也邇年以來諸臣工有以蜡祭為請朕追惟舊制酌古準今有宜於詳慎者考大

蜡之禮昉於伊耆三代因之所以報萬物之成也雖
咏於詩詳於禮記周官而古制賈遠傳註參錯難以
折衷所謂八蜡配以昆蟲後儒謂其害稼不當與祭
月令祈年於天宗蜡祭也註云日月星辰則所主又
非八神至謂合聚萬物而索饗之其神甚多尤難定
位且蜡與臘冠服各殊有謂臘即蜡者有謂蜡而後
臘者是古制已不可考終無定衡至於後世自漢臘
而不蜡此禮已湮魏晉以來迄於唐宋時行時止或

溺於五行之說甚且天帝人帝及於龍麟朱鳥多至
百九十二座議者以為失先王之禮遠矣蘓軾曰迎
貓則為貓之尸迎虎則為虎之尸近於倡優所為是
以子貢觀於蜡言一國之人皆若狂以其沿習日久
迹類於戲也蓋祀於南郊已不合於古制而蜡於四
郊則惟順成之方始祭較量區別叢雜瑣細於義有
乖於禮未洽於神為藝自元明以來停止此典實有
難以舉行之處况蜡祭諸神如先嗇司嗇日月星辰

山林川澤今皆祀於各壇廟原於典文無關即民間
秋成之後休息農功祀神報賽大抵借蜡之遺意以
盡其閭井歡洽之情猶有吹豳擊鼓之風亦皆聽從
民便未嘗禁止是蜡祭原行於民間但田夫萃處雜
以嬉戲各隨其鄉之風尚初不責以儀文若朝廷議
祀潔蠲虔享必嚴肅整齊何至有一國若狂之論可
知此祭即古亦閭閻相沿之舊俗詎可定以為郊廟
典禮如以為有祈無報則方春而祈穀冬又有事於

圜丘禮謂郊之祭為大報天又云萬物本乎天大報本也
豈得謂之有祈無報乎況二仲薦馨並崇社稷班固
所謂為天下求福報功者具在陳祥道所謂大社國
社農之所報在焉今

社稷壇春秋兩祀祈報之禮已備至義近於重複事涉
於不經者即下之禮臣亦難定議因諸臣但泥古制
多未深攷是以特降此旨俾共知之

臣等謹按杜典有靈星一門攷漢立靈星祠以天

田主穀農祥晨見而祭之配以后稷蓋即祈穀之意我

朝定制列星為

圜丘從位孟春祈穀則已及之后稷為

太稷配位春秋祈報祭典具備靈星之祀誠無事於複舉矣此條謹從刪去

皇朝通典卷四十二